

To peha taua e te 'Kiri-rarauhe ki te rangi.  
 Na to poriro au nei.  
 Moe atu ana aku kanohi ki a Tukorehu,<sup>35</sup>  
 Ki te hunga nana i takitaki taku mate, ka ea Waipoua.  
 Kaati ra te whakakeke noa i te pakanga,  
 Uatakitia te Hapaio-taetae-o-Maui.<sup>36</sup>  
 Kia tipaoa te tili ki Tongariro, ki a Matotoru,<sup>37</sup>  
 E rua aku ringa ki te here mai te aitanga  
 Na Tuwharetoa,<sup>38</sup> hei kai e!

I au ra, e Weu<sup>39</sup> ma, i te pani taua,  
 E takoto nei te mamae, me he ngau-atua.  
 E tatari kau atu ana ki a te Whare-aorere.  
 Ma Taratuehu e ranga mai te muri raro.  
 Me whakatakoto ki te ngaro tangata, ki Hauraki,  
 Ki a Tuterangi-anini;<sup>40</sup>  
 Hei arataki ki te Rerenga-wairua,  
 Ki a Miru,<sup>41</sup> ki a Te Hotete,  
 Kia pehia mai te kuri<sup>42</sup> awarua  
 Mo te makariri, e totope nei te hukarere,  
 Nga taritari<sup>43</sup> o Matariki.  
 Te anga atu ki Tokerau,<sup>44</sup> ki te hunga kai i a koe.  
 Kei te mate haukore noa te nui ware.  
 Ka whanatu au ka tipu ki Taranaki, ki a Te Haukopa.<sup>45</sup>  
 E koro ka tutuki ki te Moana-pounamu, ki a Pairo.<sup>47</sup>  
 Ka pai ano au ki te tihotihoi, ki te makihoi.  
 Na te pakitua i aku ringa,  
 Ka te whakaihi ki te hihī o te ra.  
 E whatu koutou nei, e whae ma,  
 I te kahu o te ao marama;  
 Kia whakatihohē<sup>48</sup> au i te roa o te whenua.  
 Hei paki waitara kau ake au ma te ngutu o te tangata,  
 Kokoia i. ara e!

Ko enei whakamarama na Te Taite Te Tomo. Ma etahi e tuku mai a ratau.

<sup>1</sup>Tiheiā:—He taumata kei Pukawa, Taupo.

<sup>2</sup>Te Heuheu:—Ko Te Heuheu Herea.

<sup>3</sup>E tatangi, etc.:—Ko tenei me te rarangi i raro tata iho nei ehara i a Karangi.

<sup>4</sup>Ngati-Waipare:—Kaore tenei ingoa hapu i roto i a Ngati-Tuwharetoa, engari a Ngati-Raukawa.

<sup>5</sup>Hautapa tika:—Ka hanga te kiri totara hei waka huahua, ka kiia he patua. Ko nga hautapa he taha no te patua, ko te kiri tonu o te totara, hangaia ai. Ko te hautapa tika ko te taha mauī, ka whakaritea ki te kaokao mauī o te tangata, i te ngawaritanga e piri nei ki te manawa. Ka kiia tera ko te hautapa tapu; ko te taha katau he hautapa noa.

<sup>6</sup>Takeke:—Ko tetahi o nga toa a Te Heuheu, nana i patu a Pohoiti ki Whangamata, i te pito tuaraki o te moana o Taupo.

Ko te take tenei o te patere a Karangi.

<sup>7</sup>Tukino:—Ko Te Heuheu e korerotia i runga ake nei.

<sup>8</sup>Whakaari:—E kiia nei e te pakeha ko White Island.

<sup>9</sup>Paepae-aotea:—He motu iti, he toka e piri tonu ana ki Whakaari.

<sup>10</sup>Taroia:—Ki etahi 'takahia.'

<sup>11</sup>Moana a Kupe:—Tokorua nga tupuna o nehera e whakahuatia ana o raua ingoa ki runga ki te moana, ko Kupe, ko Kiwa.

<sup>12</sup>Whangara:—Kei te rawhiti, kei raro ake o Turanga. Ko te kainga tera o Hine-matiaro.